



11. juni 2026

UPA2026/205

**Uunga siunnersuut: Inatsisartut Ombudsmandiat pillugu Inatsisartut inatsisaat.**

*(Inatsisartut Siulittaasoqarfiat)*

Inatsisartut Siulittaasoqarfiat siunnersuummik saqqummiussinermut qujassuteqarfigaarput.

Siumumi isumaqarpugut Inatsisartut Ombudsmandiat nunatsinni tamat oqartussaaqataaneramik ingerlatsiviusumi suliffeqarfiit pingaarnerpaat ilagigaat. Ombudsmandi innuttaasut sinnerlugit namminersortumik nakkutilliisuvoq, pisortat ingerlatsiviini kukkunernik, pissaanermik atornerluisoqarnerseq aammalu suliassanik pitsaasumik suliarinninnginnermik nakkutilliisartoq.

Nunatsinni pisortat ingerlatsiviisa innuttaasut ulluinnarni inuunerannut annertuumik sunnuteqartarneranni pingaaruteqarluinnarpoq suliffeqarfik, arlaannaanulluunniit attuumassuteqarani pitsaasumik ingerlasoq, oqartussaasut inatsisunik malinninnerannik aammalu innuttaasut eqqortumik naapertuilluartumillu sullinneqarnerannik qulakkeerisinnaasoq matumani pineqarpoq.

Tamatuma saniatigut Siumumi Ombudsmandip aammalu sulisui ukiuni ingerlanerini nunatsinni inuiaqatigiinnut sullissinerat annertoq akuersaarlutigu nersorniarpaput. Ombudsmandip misissuineri, inassuteqaatai ukiumoortumillu nalunaarusiai innuttaasut inatsisitigut illersugaanerannik nukittorsaanermik tunngaveqartut, pisortat ingerlatsinerannut pitsanngorsaaniissamik malitseqartartut aammalu innuttaasut oqartussaasullu akornanni tatigeqatigiinnerup annertunerulernissaanik ingerlataqartarpoq.

Innuttaasut amerlasuut Ombudsmandi aqqutigalugu suliannik saqqummiussinissamut ikiorneqarsimapput, kukkussuteqarsimanermik imaluunniit naapertuilluannngitsumik pineqarsimanermik misigisimagunik. Taamaalilluni Ombudsmandi inatsisitigut nakkutilliisuinnaanngilaq, aammali inuiaqatigiinni naapertuilluarnerup, torersumik eqqortumillu ingerlatsinerup aammalu pisortat ingerlatsineranni ileqqorissaarnerup pingaarutilimmik ingerlatsiviginissaa suliarisartagaanni aamma qitiupput.

Siumumiit maluginiarparput siunnersuummi matumani pingaarnertut inatsisartut inatsisaannik nutarterineq aammalu erseqqissaanerit pineqartut.

Ombudsmandip pinngitsoorani 65-inik ukioqaleruni soraarninngornissaanut piumasaqaat 70-inik ukioqalernissaanut atuuffeqarsinnaanerata qaffaaffigineqarnissaa Siumumiit ilalerparput. Misilittagaqarneq, piginnaasaqarneq ilisimasaqarnerlu ukiut 65-it qaangerneranni taamaatinneq ajorpoq. Illuatungaanili ukiuni amerlasuuni inatsisilerituutut aqutsinermilu misilittagaqarneq Ombudsmanditut suliffeqarfimmut nukittorsaataalluarsinnaavoq.

Taamatuttaaq maluginiarparput siunnersuummi Ombudsmandip inatsisilerinermik ilinniagaqarsimaneranut piumasaqaatit aammalu akissarsiaqartitaanera, utoqqalinersiuteqarnissaanut tunngasut, atorfinitsitaanerannullu tunngasut erseqqinnerulersinneqartut isumaqatigaagut. Peqatigisaanik maleruagassat atuuttut naapertorlugit sulisunut inissiamik



innersuunneqarsinnaatitaaneq erseqqissarneqarpoq. Taamatuttaaq Inatsimmi kalaallisut allassimaneri ersarissarlugit inissiisoqarnissaa soorunami paasilluarparput. Allanguutit taakku inatsimmik ersarinnerusunngortitsipput ullutsinnullu naleqqunnerulersillugu.

Siumumiit pingaernerpaatut isigaarput allanguutit ataasiakkaat tekniskiusut pinnagit, Ombudsmandip namminersortutut inissisimanerata illersorneqarnissaa. Ombudsmandimi politikikkut akuliuffigineqarani oqartussaasut iliuuserisaannik misissuisinnaallunilu isornartorsiuisinnaasariaqarpoq. Innuttaasut suliffeqarfimmut tatiginninnerat tassunga tunngaveqarpoq, Ombudsmandi namminersortumik, tunngavissaqarluartumik aammalu piginnaasaqarluartumik sulinera pissutigalugu.

Aammattaaq pitsaasutut isigaarput siunnersuummi Ombudsmandip Naalagaaffiit Peqatigiit naalliutsitsisarnermut akiuinnermut isumaqatigiissutaata ilassutaatut isumaqatigiissut naapertorlugu pinaveersaartitsinermi namminersortumik ingerlatsisutut inissisimanagera ingerlaqqissasoq. Kalaallit Nunaanni inuit pisinnaatitaaffiitut, inatsisitigut illersugaanermut aammalu kiffaangissuseqarnermik arsaarneqarsimasunik illersuinissamut tunngatillugu nunani tamalaani piumasaqaatinik malinnittariaqarmat.

Taamaattumik Siumumi siunnersuut manna aqutsinermut tunngasunik iluarsisutaannaasutut isigineqanngilaq. Aammali suliffeqarfiup ukiuni amerlasuuni innuttaasut pisinnaatitaaffiit illersuisuusup aammalu inuiaqatigiinnik naapertuilluarnerusunik akisussaassuseqarnerusunillu ineriartortitseqataasimasup ingerlaqqinnissaanut nukittorsarnissaanullu tunngasuvoq.

Taamaattumik Siumumi siunnersuut taparserparput aammalu taamak isikkoqartillugu aappassaaneerneqarnissaa pingajussaaneerneqarnissaalu innersuussutigalugu.

Erik Jensen, Siumut